

茶經

下



傳

唐陸羽字鴻漸一名疾字季疵復州竟陵人不知所
生或言有僧晨起聞湖傍羣鴈喧集以翼覆一嬰兒
遂收畜之既長以易自筮得蹇之漸曰鴻漸于陸其
羽可用爲儀乃以陸爲氏名而字之幼時其師教以
旁行書荅曰終鮮兄弟而絕後嗣得爲孝乎師怒使
執糞除圻垣以苦之又使牧牛三十羽潛以竹畫牛
背爲字得張衡兩都賦不能讀危坐效羣兒哢嚅若
成誦狀師拘之令薙草莽當其記文字懵懵若有遺

過且不作主者鞭苦因歎曰歲月往矣奈何不知書
嗚咽不自勝因亡去匿爲優人作訴諸數千言大寶
中州人酺吏署羽伶師太守李齊物見異之授以書
遂廬火門山貌佻陋口吃而辯聞人善若在已見有
過者規切至忤人朋友燕處意有所行輒去人疑其
多嗔與人期雨雪虎狼不避也上元初更隱若溪自
稱桑苧翁又號竟陵子東園先生東岡子闔門著書
或獨行野中誦詩擊木徘徊不得意或慟哭而歸故
時謂今接輿也久之詔拜羽太子文學從太常寺太

祝不就職貞元末卒羽嗜茶著茶經三篇言茶之源
之法之具尤備天下益知飲茶矣時鬻茶者至陶羽
形置煬突間祀爲茶神有常伯熊者因羽論復廣著
茶之功御史大夫李季卿宜慰江南次臨淮知伯熊
善煮茶召之伯熊執器前季卿爲再舉盃至江南又
有薦羽者召之羽衣野服挈具而入季卿不爲禮羽
愧之更著毀茶論其後尚茶成風時回紇入朝始驅
馬市茶

童史氏承叙曰余嘗過竟陵憇羽故寺訪鴈橋觀茶

井慨然想見其爲人夫羽少厭髭緇篤嗜墳素本非
忘世者卒廼寄號桑夢遁跡茗膏嘯歌獨行繼以痛
哭其意必有所在時廼比之接輿豈知羽者哉至其
性其茗薺味辨滄溟清風雅趣膾炙今古張顛之於
酒也昌黎以爲有所託而逃羽亦以是夫

茶經外集

明 新都孫大綬編次

明 晉安鄭 燧校梓

唐

六羨歌

陸羽

不羨黃金壘 不羨白玉盃 不羨朝入省 不羨暮入臺
千羨萬羨西江水 曾向竟陵城下來

茶歌

盧仝

日高丈五睡正濃 將軍扣門驚周公 口傳諫議送書

信曰絹斜封二道印開緘宛見諫議面手閱月團三百片聞道新年入山裏蟄虫驚動春風起天子須當陽羨茶百草不敢先開花仁風暗結珠蓓蕾先春抽出黃金芽摘鮮焙芳旋封裹至精至好且不奢至尊之餘令王公何事便到山人家柴門反關無俗客紗帽籠頭自煎吃碧雲引風吹不斷白花浮光凝枕面一椀喉吻潤二椀破孤悶三椀搜枯腸惟有文字五千卷四椀發輕汗平生不平事盡向毛孔散五椀肌骨清六椀通仙靈七椀吃不得也唯覺兩腋習習清

風生蓬萊山在何處
玉川子乘此清風欲歸去
山上群仙司下土地
位清高隔風雨安得知
百萬億蒼生命墮顛崖
受辛苦便從諫議問
蒼生到頭不得蘇
息否

送羽採茶

皇甫曾

千峰待逋客香茗復叢生
採摘知深處烟霞羨獨行
幽期山寺遠野飯石泉清
寂寂燃燈夜相思磬一聲

送羽赴越

皇甫冉

行隨新樹深夢隔重江遠
迢遞風日間蒼茫洲渚晚

尋陸羽不遇

僧皎然

移家雖帶郭野徑入桑麻近種籬邊菊秋來未著花
扣門無犬吠欲去問西家報道山中出歸來每日斜

西塔院

裴拾遺

竟陵文學泉蹤跡尚虛無不獨支公住曾經陸羽居
草堂荒產蛤茶井冷生魚一汲清冷飲高風味有餘

宋

鬪茶歌

范希文

年年春自東南來建溪先暖冰微開溪邊奇花冠天

下武夷仙人從古裁新雷昨夜發何處家家嬉笑穿
雲去露芽錯落一番榮綴玉含珠散嘉樹終朝采掇
未盈簍惟求精粹不敢貪研膏焙乳有雅製方中圭
今圓中蟾北苑將期獻天子林下雄豪先闢美鼎磨
雲外首山銅瓶携汧上中濡水黃金碾畔綠雲飛碧
玉甌中翠濤起關茶味今輕醍醐關茶香今薄蘭芷
其間品第胡能欺十目視而十手指勝若登仙不可
攀輪同降將無窮耻吁嗟天產石上英論功不愧階
前賞衆人之濁我獨清千人之醉我獨醒屈原試與

招魂魄劉伶却得聞雷霆盧仝敢不歌陸羽須作經
森然萬象中焉知無茶星商山丈人休茹芝首陽先
生休採薇長安酒價減千萬成都藥市無光輝不如
仙山一啜好冷然便欲乘風飛君莫羨花間女郎只
鬪草贏得珠璣滿斗歸

觀陸羽茶井

王禹偁

甃石封苔百尺深試茶滋味少知音惟餘半夜泉中
月留得先生一片心

茶經水辨

唐江州刺史張又新煎茶水記

元和九年春余初成名與同年生期于薦福寺余與李德垂先至憇西廂玄鑒室會適有楚僧至置囊有數編書余偶抽一通覽焉文細密皆雜記卷末又下題云煮茶記云代宗朝李李卿刺湖州至維揚逢陸處士鴻漸李素熟陸名有傾蓋之權因之赴郡抵楊子驛將食李曰陸君善于茶蓋天下聞名矣况楊子南零水又殊絕今日一妙千載一遇可曠之乎命軍

士謹信者挈瓶操舟深詣南零陸利器以俟之俄水至陸以杓揚其水曰江則江矣非南零者似臨岸之水使曰某權舟深入見者累百敢虛紿乎陸不言旣而傾諸盆至半陸遽止之又以杓揚之曰自此南零者矣使蹶然大駭馳下曰某自南零齎至岸舟蕩覆半懼其渺挹岸水增之處士之鑒神鑒也其敢隱焉李與賓從數十人皆大駭愕李因問陸旣如是所經歷處之水優劣精可判矣陸曰楚水第一晉水最下李因命筆口授而次第之凡二十水且曰此皆余嘗

試之非係茶之精粗過此不之知也夫茶烹於所產
處無不佳也蓋水土之宜離其處水功其半然善煮
潔器全其功也李置諸筥焉遇有烹茶者卽示之

宋歐陽修大明水記

世傳陸羽茶經其論水云山水上汗水次井水下又云山水乳泉石池漫流者上瀑湧湍瀨勿食食久令人有頸疾汗水取去入遠者井水取汲多者其說止此而未嘗品第天下之水味也至張又新爲煎茶水記始云劉伯芻謂水之宜茶者有七等又載羽爲季季卿論水次第有二十種今考二說與羽茶經皆不合羽謂山水上而乳泉石池又上汗水次而井水下伯芻以楊子江爲第一惠山石泉爲第二虎丘石井

爲第三丹陽寺井爲第四揚州大明寺井第五松江
第六淮水第七與羽說皆相反羽所說二十水廬山
康王谷水第一無錫惠山石泉第二蘄州蘭谿石下
水第三峽州扇子峽蝦蟆口水第四虎丘寺石泉第
五廬山招賢寺下方橋潭水第六楊子江南零水第
七洪州西山瀑布水第八桐柏淮源第九廬州龍池
山頂水第十丹陽觀音寺井第十一揚州大明寺井
第十二漢江金州中零水第十三歸州王虛洞香溪
水第十四商州武關西洛水第十五松江十六天台